

AGRIOTAS E POUMETAS

Pouesias e dichas risoulièiras

Jousè TELLIER

Mèstre en Gai-Sabe

*Se per asard dins ma coumpota,
Trapas lou clos d'una agriota
Sans dire res, envalas-lou
E perdounas, au Cigalou.*

J. T.

*Avèn pas res de nòu, sus la Terra que vira
Ce que cresèn nouvèl, es de l'autre coustat
E quant a fach lou tour vesèn nostra satira.
Tout pot sanja de pèl, mès ce qu'es, es estat.*

LETRA

per servi d'avant-prepaus

CLARMOUNT-D'ERAUT, Janviè 1933

Me demandats, moun car amic, d'escrivre al sulhet de vostre libre quauques mots de prefacia. Per de que? Vostre gaubi coustumiè, vostra bouna imour counescuda, vostra pouesia presada, valent a dire, tout so que vostre noum, en tèsta d'un libre, proumet, es mai que sufisent per metre vostre aimable legeire dins la pus granda impaciensa de vira lous prumiès fulhets.

Per de que dounc l'arrèsta amb' una fastigousa prefacia que fariè l'efèct d'aqueles louns discourses que fòu als escoulans lou jour de la distribucioun das pretses e qu'i fòu retarda un pauc mai l'oura benesida de la libertat, tout l'an esperada.

Moun meriti sariè pla tènhe e lou fidèl legeire a pas besoun d'ajudas per trouba dins vostras Agriotas e Poumetas, siague dins la risoulièira dicha, siague dins la pouetica envoulada de vostras estrofas, aquel ensinhament, que, dal rire lou pas franc al frounsiment de las ussas per amaga las lagremas, i dira l'estacament a nostra bèla Terra d'Oc e l'amour de nostre clar parla mairal. E, segur, vostra obra qu'es estada pastada amourousament dins vostre cor de boun felibre pod coungrilha que toutas las vertuts de la douctrina mistralenca. P'r aco, i a quicom aicis a lausenja en mai de vostra proubitat d'escrivan, es aquela fidelitat sempre rigourousa, jamai aflaquida ou demesida, que, pauc apèi la mort dal grand pouèta de Mirèia, anèrem refresca ensemble, en coumpanha de Ferroul, lou conse aimat das Narbouneses, al sourgent viu de Malhana. E me torna a la memoria, aquela emoucioun pietadousa que nous espremissiè

lou pitre, quant anèrem culhi, per nous servi de porta-bounur, lou rampan de nèrta e la floureta blanca d'aquel rousiè qu'asoumbraba lou pouts de l'ort de Mistral. E couma d'aco i a de lounguis ans, pode assegura a toutes vostres aimables legeires que traparòu dins aqueste libre toutas las bufadas sanitousas de las bounas semens.

Sèts, moun car amic, e aco sara lou coumpliment que clabara aquesta letra, sèts d'aqueles, pauc nombreuses, qu'anèroun un jour, aprene lou secrèt a-lai, al pèd dal toumbèu de nostre Mèstre immourtal. Aqui legiguèrets, gravat dins lou malbre:

NON NOBIS, DOMINE, NON NOBIS....

.... SED PROVINCIAE NOSTRAE DA GLORIAM!

E, fidèl a' n'aqueles paraulas, vous atabe, dins aquestas goustousas Agriotas dins aquestas mellicousas Poumetas es pas per vous qu'avèts oubrat, es pas per ne reculhi ni mai de meriti, ni mai de renoum, es per la gloria dal terraire!...

Clovis ROQUES,
Felibre Majoural.